

Li coq èt li r'naud.

d'après Jean de la Fontaine.

À djok su one grosse couche, li pus vî coq dèl cinse
Monteut d' gârde po dèl nêt, choûter èt cowaîtî ;
Dès-ans èt dès razans qu'i rêfuse lès-aujeminces :
Lès pouyes, c'èst po lès djon.nes, lès voleûrs po lès vîs.
Dispû qui l' bèle rossète dèl pouyetrîye è-st-èvôye
- C'èst qu' mon lès pouyes ossi, li mwârt tûwe sins prévenu -
I s' sovint dès plaîjis, dès bouneûrs èt dès djôyes
Qu'èlle aurdeut, rin qu' por li ! I n' s'a jamais r'mètu.
Todi è-st-i qu'on djoû, i s' rèwîye à pont d'eûre :
One vraîye vwès d' djon.ne comére qu'aveut l'air dè l' priyî !
On r'naud ! On vî laîd r'naud fieut chonance di cocheûre
Li cèréjî qu' nosse coq lodjeut d'ssus peûy todi.
« Dj'a v'lu c'mincî pâs vos, l' pus vî coq do vijnauve
Po v's-anoncî l' novèle qui va r'toûrner l' payis.
Pus dandjî d' sèrer l'uch dès polîs ni dès stauves,
One fwârt grande dècision qui vos va fé plaîji.
Nos-avans rachoné lès r'nauds d' totes lès familles
Qu'ont leûs tèréyes jusqu'à vint kulomètes di d'ci ;
Il aboulin.n' tortos, i-gn-aveut tant qu'à mile,
Lès maules èt lès fumèles, d'aus pus grands j'qu'aus pus p'tits.
Tos mès frères ont vôté, i m'ont d'né leû parole :
Nos n' mougnerans pupont d' pouyes po n' pus yèsse cotchèssîs.
Dispû l' tims qu' ça dureut, dji m' doute bin qu' ça chone drole ;
Vos m' p'loz bin dire mèrci, èt m' vinu rabrèssî !
– Camarâde, di-st-i l' coq, dji su vraîmint binauje !
Dji r'tûze à mès tayons qu'ont tant rêné po ça.
Ni sèreut ç' nin lès causes di ç' qui dj' veu à mwin gauche ?
One cope di grands lèvrîs véla drî lès fouyas.
I vègnenut advêrti qui l' paîs a stî sinéye
Ètur nos deûs familles, èt qu'i 'nn'ont stî tèmwins.
S'i coûrenut ossi rade, c'èst qui là tant d's-anéyes
Qu'i prêchîn.n' po nos veûy viker à môde di djins.
–Faut qui dj' vos d'mande èscuse, mins il èst tims qu' djè l' trosse !
Nos r'mètrons à pus taurd lès baujes qui dj' ratindeu ;
C'èst qui l' toûrnéye èst grande, èt qu'i m' faut yèsse au posse,
Po qu' tot l' monde fuche prév'nu èt djouwer l' drwèt do djeu !»
Èt sins fé pus d'afaires, i l' èvôye à l' surale !
À crwêre qu'il a rovî qu'on s' duveut rabrèssî ?
Li vî coq, è li-minme, tûze, tot choyant sès spales :
« Ça fait deûs côps plaîji quand trûler, c'èst r'cassî. »

Albert Delvaux